

四庫全書

子部

欽定四庫全書

子部
朱子語類卷八十一

詳校官中書臣程炎

刑部郎中臣許兆椿覆勘

總校官中書臣朱鈞

校對官學正臣李巖

膳錄舉人臣黃嵩齡

欽定四庫全書

朱子語類卷八十一

詩二

周南關雎

兼論二南

詩末論音律且如讀二南與鄭衛之詩相去多少

問程氏云詩有二南猶易有乾坤莫只是以功化淺深
言之曰不然問莫是王者諸侯之分不同曰今只看
大序中說便可見大序云關雎麟趾之化王者之風

故繫之周公鵲巢駟虞之德諸侯之風先王之所以
教故繫之名公只看那化字與德字及所以教字便

見二南猶乾坤也

文蔚

前輩謂二南猶易之乾坤其詩粹然無非道理與他詩
不同曰須是寬中看緊底意思因言匡衡漢儒幾語
亦自說得好曰便是他做處却不如此

矣

關雎一詩文理深奧如乾坤卦一般只可熟讀詳味不
可說至如葛覃卷耳其言迫切主於一事便不如此

了又曰讀詩須得他六義之體如風雅頌則是詩人之格後人說詩以為雜雅頌者緣釋七月之詩者以為備風雅頌三體所以啓後人之說如此又曰興之為言起也言興物而起其意如青青陵上栢青青河畔草皆是興物詩也如藁砧今何在何當大刀頭皆是比詩體也

卓

敬子說詩周南曰他大綱領處只在戒謹恐懼上只自關關雎鳩便從這裏做起後面只是漸漸推得濶個

讀關雎之詩便使人有齊莊中正意思所以冠于三百

篇與禮首言毋不敬書首言欽明文思皆同

篇

問二南之詩真是以此風化天下否曰亦不須問是要風化天下與不風化天下且要從關關雎鳩在河之洲云云裏面省義理是如何今人讀書只是說向外面去却於本文全不識

本之

關雎之詩非民俗所可言度是宮闈中所作問程子云

是周公作曰也未見得是

之本

關雎看來是妾媵做所以形容得寤寐反側之事外人

做不到此

明作

樂得淑女以配君子憂在進賢不淫其色

天理人欲○方

說后妃多失却文王了今以君子為文王伊川詩說多

未是璘

問罷遠君舉所說詩謂關雎如何曰謂后妃自謙不敢當君子謂如此之淑女方可為君子之仇匹這便是后妃之德曰這是鄭氏也如此說了某看來恁地說

也得只是覺得偏主一事無正大之意關雎如易之
乾坤意思如何得恁地無方際如下面諸篇却多就
一事說這只反覆形容后妃之德而不可指說道甚
麼是德只恁地渾淪說這便見后妃德盛難言處賀孫

問曹兄云陳丈說關雎如何曹云言關雎以美夫人有
謙退不敢自當君子之德曰如此則淑女又別是一
箇人也曹云是如此先生笑曰今人說經多是恁地
回互說去如史丞相說書多是如此說祖伊恐奔告

於受處亦以紂為好人而不殺祖伊若他人則殺之矣先生乃云讀書且虛心去者未要自去取舍且依古人書恁地讀去久後自然見得義理卓

魏兄問左右筆之曰筆是擇也左右擇而取之也卓

解詩如抱橋柱浴水一般終是離脫不得鳥獸草木今在眼前識得底便可窮究且如睢鳩不知是箇甚物亦只得從他古說道是摯而有別之類

魏才仲問詩關雎注摯至也至先生作切至說似形容

其美何如曰也只是恁地問筆字曰擇也讀詩只是
將意思想像去看不如他書字字要捉縛教定詩意
只是疊疊推上去因一事上有一事一事上又有一
事如關雎形容后妃之德如此又當知君子之德如
此又當知詩人形容得意味深長如此必不是以下
底人又當知所以齊家所以治國所以平天下人君
則必當如文王后妃則必當如太姒其原如此

賀孫

雉鳩毛氏以為摯而有別一家作猛摯說謂雉鳩是鷄

之屬鷄自是沈鷲之物恐無和樂之意蓋摯與至同
言其情意相與深至而未嘗狎便見其樂而不淫之
意此是興詩興起也引物以起吾意如雉鳩是摯而
有別之物苜蓿菜是潔淨和柔之物引此起興猶不甚
遠其他亦有全不相類只借它物而起吾意者雖皆
是興與關雎又畧不同也

時舉

古說關雎為王雎摯而有別居水中善捕魚說得來可
畏當是鷹鷂之類做得勇武氣象恐后妃不然某見

人說淮上有一般水禽名王睢雖兩兩相隨然相離
每遠此說却與列女傳所引義合浩

王鳩嘗見淮上人說淮上有之狀如此間之鳩差小而
長常是雌雄二箇不相失雖然二箇不相失亦不曾
相近而立處須是隔丈來地所謂摯而有別也人未
嘗見其乘居而匹處匹處謂兩箇同處也只是二箇
相隨既不失其偶又未嘗近而相狎所以為貴也余
正甫云宵行自是夜光之蟲夜行於地熠燿言其光

耳非螢也芑今之苦賈

孫賀

卷耳

問卷耳與前篇葛覃同是賦體又似畧不同蓋葛覃直叙其所嘗經歷之事卷耳則是託言也曰亦安知后妃之不自采卷耳設使不曾經歷而自言我之所懷者如此則亦是賦體也若螽斯則只是比蓋借螽斯以比后妃之子孫衆多宜爾子孫振振兮却是說螽斯之子孫不是說后妃之子孫也蓋比詩多不說破

這意然亦有說破者此前數篇賦比興皆已備矣自此推之令篇篇各有著落乃好時舉因云螽只是春秋所書之螽竊疑斯字只是語辭恐不可把螽斯為名曰詩中固有以斯為語者如鹿斯之奔湛湛露斯之類是也然七月詩乃云斯螽動股則恐螽斯即便是名也時舉

樛木

問樛木詩樂只君子作后妃亦無害否曰以文義推之

不得不作后妃若作文王恐太隔越了某所著詩傳
盖皆推尋其脉理以平易求之不敢用一毫私意大
抵古人道言語自是不泥著某云詩人道言語皆發
乎情又不比他書曰然可學

蝥斯

不妬忌是后妃之一節關雎所論是全體方子

兔置

問兔置詩作賦看得否曰亦可作賦者但其辭上下相

應恐當為興然亦是興之賦

可學

漢廣

問文王時紂在河北政化只行於江漢曰然西方亦有

獫狁

可學

漢廣游女求而不可得行露之男不能侵陵正女豈當
時婦人蒙化而男子則非亦是偶有此樣詩說得一

邊

淳

問漢之廣矣不可泳思江之永矣不可方思此是興何

如曰主意只說漢有游女不可求思兩句六句是反
復說如奕奕寢廟君子作之秩秩大猷聖人莫之他
人有心予忖度之躍躍鳧兔遇犬獲之上下六句亦只

興出他人有心兩句

賀孫○詩傳
今作興而比

汝墳

君舉詩言汝墳是已被文王之化者江漢是聞文王之
化而未被其澤者却有意思

麟趾

問麟趾騶虞之詩莫是當時有此二物出來否曰不是
只是取以為比云即此便是麟便是騶虞又問詩序
說麟趾之時無義理曰此語有病之木

時舉說雖哀世之公子皆信厚如麟趾之時似亦不成

文理曰是時

舉

召南鵲巢

問召南之有鵲巢猶周南之有關雎關雎言窈窕淑女
則是明言后妃之德也惟鵲巢三章皆不言夫人之

德如何曰鳩之為物其性專靜無比可借以見夫人之德也

時舉

采繁

問采蘋繁以供祭祀米臬耳以備酒漿后妃夫人恐未

必親為之曰詩人且是如此說

德明

器之問采繁何故存兩說曰如今不見得果是如何且與兩存從來說繁所以生蠶可以供蠶事何必底死說道只為奉祭事不為蠶事

木之

問采芣詩若只作祭事說自是曉然若作蠶事說雖與
葛覃同類而恐實非也葛覃是女功采芣是婦職以
為同類亦無不可何必以蠶事而後同耶曰此說亦
姑存之而已

時舉

殷其雷

問殷其雷比君子于役之類莫是寬緩和平故入正風
曰固然但正變風亦是後人如此分別當時亦只是
大約如此取之聖人之言在春秋易書無一字虛至

于詩則發乎情不同

可學

標有梅

問標有梅何以入於正風曰此乃當文王與紂之世方

變惡入善未可全責備

可學

問標有梅之詩固出于正只是如此急迫何耶曰此亦是人之情嘗見晉宋間有怨父母之詩讀詩者於此

亦欲達男女之情

文蔚

江有汜

罷之問江有汜序勤而無怨之說曰便是序不可信如此詩序自是兩三人作今但信詩不必信序只看詩中說不我以不我過不我與便自見得不與同去之意安得勤而無怨之意因問罷之此詩召南詩如何公方看周南便又說召南讀書且要逐處沈潛次第理會不要班班剝指東摘西都不濟事若能沈潛專一看得文字只此便是治心養性之法本

何彼穠矣

問何彼穠矣之詩何以錄于召南曰也是有此不穩當
但先儒相傳如此說也只得恁地就他說如定要分
箇正經及變詩也自難考據如頌中儘多周公說話
而風雅又未知如何賀孫
雖則王姬亦下嫁於諸侯車服不繫其夫下王后一等
只是一句其語拙耳璘

騶虞

騶虞之詩盖于田獵之際見動植之蕃庶因以贊詠文

王平昔仁澤之所及而非指田獵之事為仁也禮曰
無事而不田曰不敬故此詩彼茁者葭仁也一發五

豝義也

必大

仁在一發之前使庶類蕃殖者仁也一發五豝者義也

人傑

于嗟乎騶虞者來只可解做獸名以于嗟麟分類之可

見若解做騶虞官終無甚意思

個

邨栢舟

問汎彼栢舟亦汎其流注作比義者來與關關雉鳩在
河之洲亦無異彼何以為興曰他下面便說淑女見
得是因彼興此此詩纔說栢舟下面更無貼意見得
其義是比時舉

陳器之疑栢舟詩解日居月諸胡迭而微太深又屢辨
賦比興之體曰賦比興固不可以不辨然讀詩者須
當諷味者他詩人之意是在甚處如栢舟婦人不得
於其夫宜其怨之深矣而其言曰我思古人實獲我

心又曰靜言思之不能奮飛其詞氣忠厚惻怛怨而不過如此所謂止乎禮義而中喜怒哀樂之節者所以雖為變風而繼二南之後者以此臣之不得於其君子之不得于其父弟之不得於其兄朋友之不相信處之皆當以此為法如屈原不忍其憤懷沙赴水此賢者過之也賈誼云歷九州而相其君兮何必懷此都也則又失之遠矣讀詩須合如此看所謂詩可以興可以觀可以羣可以怨是詩中一箇大義不可不

理會得也

祖 閑

罷之問靜言思之不能奮飛似猶未有和平意曰也只
是如此說無過當處既有可怨之事亦須還他有怨
底意思終不成只如平時却與土木相似只看舜之
號泣旻天更有甚於此者喜怒哀樂但發之不過其
則耳亦豈可無聖賢處憂患只要不失其正如綠衣
言我思古人實獲我心這般意思却又分外好之

綠衣

或問綠衣卒章我思古人實獲我心二句曰言古人所
為恰與我合只此便是至善前乎千百世之已往後
乎千百世之未來只是此箇道理孟子所謂得志行
乎中國若合符節政謂是爾

胡泳

燕燕

或問燕燕卒章戴嬀不以莊公之已死而勉莊姜以思
之可見溫和惠順而能終也亦緣他之心塞實淵深
所稟之厚故能如此曰不知古人文字之美詞氣溫

和義理精密如此秦漢以後無此等語某讀詩於此
數句讀書至先王肇修人紀從諫弗弗先民時若居
上克明為下克忠與人不求備檢身若不及以至於
有萬邦茲惟艱哉深誦嘆之

胡泳

時舉說燕燕詩前三章但見莊姜拳拳于戴媯有不能
已者及四章乃見莊姜于戴媯非是情愛之私由其有
塞淵溫惠之德自能淑謹其身又能以先君之思而
勉已以不忘則見戴媯平日于莊姜相勸勉以善者

多矣故於其歸而愛之若此無非情性之正也先生

頷之時

舉

日月終風

又說日月終風二篇據集注云當在燕燕之前以某觀之終風當在先日月當次之燕燕是莊公死後之詩當居最後蓋詳終風之辭莊公于莊姜猶有往來之時但不暴則狎莊姜不能堪耳至日月則見莊公已絕不顧莊姜而莊姜不免微怨矣以此觀之則終風

當先而日月當次日恐或如此

時舉

式微

罷之問式微詩以為勸耶戒耶曰亦不必如此看只是隨它當時所作之意如此便與存在也可以見得有羈旅狼狽之君如此而方伯連帥無救卹之意今人多被止乎禮義一句泥了只管去曲說且要平心看詩人之意如北門只是說官卑祿薄無可如何又如標有梅女子自言婚姻之意如此看來自非正理但

人情亦自有如此者不可不知向見伯恭麗澤詩有
唐人女言兄嫂不以嫁之詩亦自鄙俚可惡後來思
之亦自是見得人之情處為父母者能於是而察之
則必使之及時矣此所謂詩可以觀子升問麗澤詩
編得如何曰大綱亦好但自據他之意揀擇大率多
喜深巧有意者若平淡底詩則多不取問此亦有接
續三百篇之意否曰不知他亦須有此意

木之

簡分

問簡兮詩張子謂其迹如此而其中固有以過人者夫
能卷而懷之是固可以為賢然以聖賢出處律之恐
未可以為盡善曰古之伶官亦非甚賤其所執者猶
是先王之正樂故獻工之禮亦與之交酢但賢者而
為此則自不得志耳時舉

泉水

問駕言出遊以寫我憂注云安得出遊于彼而寫其憂
哉恐只是因思歸不得故欲出遊於國以寫其憂否

曰夫人之遊亦不可輕出只是思遊於彼地耳時舉

北門

問北門詩只作賦說如何曰當作賦而比當時必因出

北門而後作此詩亦有比意思

可學

問莫赤匪狐莫黑匪烏狐與烏不知詩人以比何物曰不但指一物而言當國將危亂時凡所見者無非不

好底景象也

時舉

靜女

問靜女注以為淫奔期會之詩以靜為閒雅之意不知
淫奔之人方相與狎溺又何取乎閒雅曰淫奔之人
不知其為可醜但見其為可愛耳以女而俟人於城
隅安得謂之閒雅而此曰靜女者猶日月詩所謂德
音無良也無良則不足以為德音矣而此曰德音亦
愛之之辭也時舉

二子乘舟

問二子乘舟注取太史公語謂二子與申生不明驪姬

之過同其意似取之未知如何曰太史公之言有所抑揚謂三人皆惡傷父之志而終于死之其情則可取雖於理為未當然視夫父子相殺兄弟相戮者則

大相遠矣

時舉

因說宣姜生衛文公宋桓夫人許穆夫人衛壽朔以此觀之則人生自有秉彜不係氣類熹

干旄

問文蔚彼姝者子指誰而言文蔚曰集傳言大夫乘此

車馬以見賢者賢者言車中之人德美如此我將何
以告之曰此依舊是用小序說此只是傍人見此人
有好善之誠曰彼姝者子何以告之蓋指賢者而言
也如此說方不費力今若如集傳說是說斷了再起
覺得費力

文蔚

淇澳

文蔚曰淇澳一篇衛武公進德成德之序始終可見一
章言切磋琢磨則學問自修之功精密如此二章言

威儀服飾之盛有諸中而形諸外者也三章言如金
錫圭璧則煅煉以精溫純深粹而德器成矣前二章
皆有瑟僎赫咺之詞三章但言寬綽戲謔而已於此
可見不事矜持而周旋自然中禮之意曰說得甚善
衛武公學問之功甚不苟年九十五歲猶命羣臣使
進規諫至如抑詩是他自警之詩後人不知遂以為
戒厲王畢竟周之卿士去聖人近氣象自是不同且
如劉康公謂民受天地之中以生便說得這般言語

出文
蔚

君子陽陽

君子陽陽先生不作淫亂說何如曰有箇君子于役如
何別將這箇做一樣說由房只是人出入處古人屋
於房處前有壁後無壁所以通內所謂焉得諼草言
樹之背蓋房之北也賀孫

狡童

魚論
鄭詩

鄭衛皆淫奔之詩風雨狡童皆是又豈是思君子刺忽

忽愚何以為狡振

經書都被人說壞了前後相仍不覺且如狡童詩是序之妄安得當時人民敢指其君為狡童况忽之所為可謂之愚何狡之有當是男女相怨之詩浩

問狡童刺忽也古注謂詩人以狡童指忽而言前輩嘗舉春秋書忽之法且引碩鼠以況其義先生詩解取程子之言謂作詩未必皆聖賢則其言豈免小疵孔子刪詩而不去之者特取其可以為後戒耳琮謂鄭

之詩人果若指斥其君目以狡童其疵大矣孔子自
應刪去曰如何見得曰似不曾以狡童指忽且今所
謂彼者它人之義也所謂子者爾之義也他與爾似
非共指一人而言今詩人以維子之故使我不能餐
兮為憂忽之辭則彼狡童兮自應別有所指矣曰却
是指誰曰必是當時擅命之臣曰不與我言兮却是
如何曰如祭仲賣國受盟之事國人何嘗與知琮因
是以求碩鼠之義烏知必指其君而非指其任事之

臣哉曰如此解經盡是詩序悞人鄭忽如何做得狡
童若是狡童自會託婚大國而借其助矣謂之頑愚
可也許多鄭風只是孔子一言斷了曰鄭聲淫如將
仲子自是男女相與之辭却干祭仲共叔段其事如
褰裳自是男女相答之辭却干忽與弔爭國其事但
以意推省狡童便見所指是何人矣不獨鄭風詩序
大率皆然問每篇詩名下一句恐不可無自一句而
下却似無用曰蘓氏有此說且如卷耳如何是后妃

之志南山有臺如何是樂得賢甚至漢廣之詩寧闕
是文王之道以下至求而不可得也尚自不妨却如
德廣所及也一句成甚說話又問大序如何曰其間
亦自有鑿說處如言國史明乎得失之迹按周禮史
官如大史小史內史外史其職不過掌書無掌詩者
不知明得失之迹却干國史甚事曰舊聞先生不取
詩序之說未能領受今聽一言之下遂活却一部毛

詩

琢

江疇問狡童刺忽也言其疾之太重曰若以當時之暴斂於民觀之為言亦不為重蓋民之於君聚則為君臣散則為仇讐如孟子所謂君之視臣如草芥則臣視君如寇讎是也然詩人之意本不如此何曾言狡童是刺忽而序詩者妄意言之致得人如此說聖人言鄭聲淫者蓋鄭人之詩多是言當時風俗男女淫奔故有此等語狡童想說當時之人非刺其君也又曰詩辭多是出於當時鄉談鄙俚之語雜而為之如

鳴鴉云拮据將茶之語皆此類也又曰此言乃周公
為之周公不知其人如何然其言皆聾牙難攷如書
中周公之言便難讀如立政君奭之篇是也最好者
惟無逸一書中間用字亦有誇張為幻之語至若周
官蔡仲等篇却是官樣文字必出於當時有司潤色
之文非純周公語也又曰古人作詩多有用意不相
連續如嘒彼小星三五在東釋者皆云小星者是在
天至小之星也三五在東者是五緯之星應在於東

也其言全不相貫卓

問碩鼠狡童之刺其君不已甚乎曰碩鼠刺君重斂蓋
暴取虐民民怨之極則將視君如寇仇故發為怨上
之辭至此若狡童詩本非是刺忽纔做刺忽便費得
無限杜撰說話鄭忽之罪不至已甚往往如宋襄這
般人大言無當有甚狡處狡童刺忽全不近傍此子
若鄭哭却是狡詩意本不如此聖人云鄭聲淫盖周
衰惟鄭國最為淫俗故諸詩多是此事東萊將鄭忽

深文詆斥得可畏

賀孫

曹云陳先生以此詩不是刺忽但詩人說他人之言如
彼狡童兮不與我言兮微子之故使我不能餐兮言
狡童不與我言則已之曰又去裏面添一箇休字也
這只是鄭人當時淫奔故其言鄙俚如此非是為君
言也

卓

鷄鳴

問鷄鳴詩序却似不妨詩中却要理會其曰鷄既鳴矣

朝既盈矣匪鷄則鳴蒼蠅之聲舊注謂夫人以蠅聲
為鷄聲所以警戒所恃以感君聽者言有誠實而已
今鷄本未鳴乃借蠅聲以給之一夕偶然其君尚以
為非信它夕其復敢言乎是曰莫是要作推托不肯
起之意在否鄙見政謂是酬答之辭曰如此說亦可

琮

著

問著是刺何人曰不知所刺但覺是親迎底詩古者五

等之爵朝祭祀似皆以充耳亦不知是說何人親迎
所說尚之以青黃素瓊瑤瑛大抵只是押韻如衛詩
說良馬六此是天子禮衛安得而有之看來只是押
韻不知古人充耳以填或用玉或用象不知是塞于
耳中為復是塞在耳外看來恐只是以線穿垂在當

耳處

子蒙

園有桃

園有桃似比詩

升卿

蟋蟀

問如蟋蟀之序全然鑿說固不在言然詩作于晉而風
係於唐却須有說曰本是唐及居晉水方改號晉琮
曰莫是周之班籍只有唐而無晉否曰文侯之命書
序固稱晉矣曰書序想是紀事之詞若如春秋書晉
之法乃在曲沃既命之後豈亦係詩之意乎曰恁地
說忒緊恰似舉子做時文去

蟋蟀自做起底詩山有樞自做到底詩皆人所自作

升
卿

幽七月

問幽詩本風而周禮籥章氏祈年於田祖則吹幽雅蜡祭息老物則吹幽頌不知就幽詩觀之其孰為雅孰為頌曰先儒因此說而謂風中自有雅自有頌雖程子亦謂然似都壞了詩之六義然有三說一說謂幽之詩吹之其調可以為風可為雅可為頌一說謂楚茨大田甫田是幽之雅噫嘻載芣豐年諸篇是幽之頌謂其言田之事如七月也如王介甫則謂幽之詩

自有雅頌今既亡矣數說皆通恐其或然未敢必也

夫道

問古者改正朔如以建子月為首則謂之正月抑只謂之十一月曰此亦不可攷如詩之月數即今之月孟子七八月之間旱乃今之五六月十一月徒枉成十二月輿梁成乃今之九十月國語夏令曰九月成枉十月成梁即孟子之十一月十二月若以為改月則與孟子春秋相合而與詩書不相合若以為不改月

則與詩書相合而與孟子春秋不相合如秦元年以

十月為首末又有正月又似不改月

義剛

問東萊曰十月而曰改歲三正之通于民俗尚矣周特
舉而迭用之耳據詩如七月流火之類是用夏正一
之日感發之類是周正即不見其用商正而呂氏以
為舉而迭用之何也曰周歷夏商其未有天下之時
固用夏商之正朔然其國僻遠無純臣之義又自有

私紀其時月者故三正皆曾用之也

時舉○無純
臣語恐記誤

問躋彼公堂稱彼兕觥民何以得升君之堂曰周初國
小君民相親其禮樂法制未必盡備而民事之艱難
君則盡得以知之成王時禮樂備法制立然但知為
君之尊而未必知為國之初此等意思故周公特作
此詩使之因是以知民事也

時舉

鴟鴞

因論鴟鴞詩問周公使管叔監殷豈非以愛兄之心勝
故不敢疑之耶曰若說不敢疑則已是有可疑者矣

蓋周公以管叔是吾之兄事同一體今既克商使之
監殷又何疑焉非是不敢疑乃是即無可疑之事也
不知他自差異造出一件事周公為之奈何哉叔重
因云孟子所謂周公之過不亦宜乎者正謂此也曰

然時
舉

或問既取我子無毀我室解者以為武庚既殺我管蔡
不可復亂我王室不知是如此否畢竟當初是管蔡
挾武庚為亂武庚是紂子豈有父為人所殺而其子

安然視之不報讐者曰詩人之言只得如此不成歸怨管蔡周公愛兄只得如此說自是人情是如此不知當初何故忽然使管蔡去監他做出一場大踈脫合天下之力以誅紂了却使出屋裏人自做出這一場大踈脫這是周公之過無可疑者然當初周公使管蔡者想見那時好在必不疑他後來有這樣事管蔡必是被武庚與商之頑民每日將酒去灌啗它乘醉以語言離間之曰你是兄却出來在此周公是弟

反執大權以臨天下管蔡豈想被這幾箇咬動了所以流言說公將不利于孺子這都是武庚與商之頑民教他使得管蔡如此後來周公所以做酒誥丁寧如此必是當日因酒做出許多事其中間思煞有說話而今書傳只載得大槩其中更有幾多機變曲折在個

東山

問東山詩序前後都是只中間插大夫美之一句便知

不是周公作矣曰小序非出一手是後人旋旋添續
往往失了前人本意如此類者多矣時舉

詩曲盡人情方其盛時則作之于上東山是也及其衰
世則作之於下伯兮是也素

破斧

破斧詩者聖人這般心下詩人直是形容得出這是答
東山之詩古人做事苟利國家雖殺身為之而不辭
如今人箇箇計較利害看你四國如何不安也得不

寧也得只是護了我斫我斧莫得闕壞了此詩說出極分明毛注却云四國是管蔡商奄詩裏多少處說四國如正是四國之類猶言四海他却照這例自

恁地說

賀孫

破斧詩須看那周公東征四國是皇見得周公用心始得這箇却是箇好話頭

義剛

問破斧詩傳何以謂被堅執銳皆聖人之徒曰不是聖人之徒便是盜賊之徒此語大槩是如此不必恁粘

皮帶骨者不成說聖人之徒便是聖人且如孳孳為善是舜之徒然孳孳為善亦有多少淺深

淳○義剛錄詳別出

安卿問破斧詩傳云被堅執銳皆聖人之徒似未可謂聖人之徒曰不是聖人之徒時便是賊徒公多年不相見意此來必有大題目可商量今却恁地如何做得工夫恁地細碎安卿因呈問目先生曰程子言有讀了後全然無事者有得一二句喜者到這一二句喜處便是入頭處如此讀將去將久自解踏著他關

挨了倏然悟時聖賢格言自是句句好須知道那一
句有契於心者實理會得那一句透如此推來推去
方解有得今只恁地包罩說道好如喫物事相似事
事道好若問那般較好其好是如何却又不知如此
濟得其事因云如破斧詩却是一箇好話頭而今却
只去理會那聖人之徒便是不曉義剛
先生謂淳曰公當初說破斧詩某不合截得緊了不知
更有甚疑曰當初只是疑被堅執銳是麁人如何謂

之聖人之徒曰有麁底聖人之徒亦有讀書識文理
底盜賊之徒淳

破斧詩最是箇好題目大有好理會處安卿適來只說
那一句沒緊要底淳曰此詩見得周公之心分明天
地正大之情只被那一句礙了曰只泥一句便是未
見得他意味淳

九罭

寬厚溫柔詩教也若如今人說九罭之詩乃責其君之

辭何處討寬厚溫柔之意

賀孫

九罭詩分明是東人願其東故致願留之意公歸豈無所於汝但暫寓信宿耳公歸將不復來於汝但暫寓信處耳是以有袞衣兮是以兩字如今都不說蓋本謂緣公暫至於此是以此間有被袞衣之人無以我公歸兮無使我心悲兮其為東人願留之詩豈不甚明白止緣序有刺朝廷不知之句故後之說詩者悉委曲附會之費多少辭語到底鶻突某嘗謂死後千百

年須有人知此意自看來直是盡得聖人之心賀孫

鴻飛遵渚公歸無所鴻飛遵陸公歸不復飛歸叶是句

腰亦用韻詩中亦有此體方子

狼跋

狼跋其胡載橐其尾此興是反說亦有些意義略似程子之說但程子說得深如云狼性貪之類公孫碩膚如言幸虜營及北狩之意言公之被毀非四國之流言乃公自遜此大美爾此古人善於辭命處必大

問公孫碩膚注以為此乃詩人之意言此非四國之所為乃公自讓其大美而不居耳蓋不使讒邪之口得以加乎公之忠聖此可見其愛公之深敬公之至云

云
看來詩人此意也回互委曲却大傷巧得來不好
曰自是作詩之體當如此詩人只得如此說如春秋
公孫于齊不成說昭公出奔聖人也只得如此書自
是體當如此 個

問公孫碩膚集傳之說如何曰魯昭公明是為季氏所

逐春秋却書云公孫于齊如其自出云耳是此意必大

二雅

小雅恐是燕禮用之大雅須饗禮方用小雅施之君臣

之間大雅則止人君可歌

必大

大雅氣象宏闊小雅雖各指一事說得精切至到嘗見
古人工歌宵雅之三將作重事近嘗令孫子誦之則
見其詩果是懽至如鹿鳴之詩見得賓主之間相好
之誠如德音孔昭以燕樂嘉賓之心情意懽切而不

夫義理之正四牡之詩古注云無公義非忠臣也無私情非孝子也此語甚切當如既云王事靡盬又云不遑將母皆是人情少不得底說得慳切如皇皇者華卽首云每懷靡及其後便須咨詢咨謀看此詩不用小序意義自然明白啻

鹿鳴諸篇

問鹿鳴四牡皇皇者華三詩儀禮皆以為上下通用之樂不知為君勞使臣謂王事靡盬之類庶人安得而

用之曰鄉飲酒亦用而大學始教宵雅肆三官其始也正謂習此蓋入學之始須教他便知有君臣之義始得又曰上下常用之樂小雅如鹿鳴以下三篇及南有嘉魚魚麗南山有臺三篇風則是關雎卷耳采芣采蘋等篇皆是然不知當初何故獨取此數篇也

時舉

常棣

雖有兄弟不如友生未必其人實以兄弟為不如友生

也猶言喪亂既平之後乃謂反不如友生乎蓋疑而

問之辭也

時舉

蘓宜又問常棣詩一章言兄弟之大畧二章言其死亡相收三章言其患難相救四章言不幸而兄弟有閱猶能外禦其侮一節輕一節而其所以著夫兄弟之義者愈重到得喪亂既平便謂兄弟不如友生其於所厚者薄如此則亦不足道也六章七章就他逸樂時良心發處指出謂酒食備而兄弟有不具則無以

共其樂妻子合而兄弟有不翕則無以久其樂蓋居
患難則人情不期而相親故天理常易復處逸樂則
多為物欲所轉移故天理常隱而難尋所以詩之卒
章有是究是圖亶其然乎之句反復玩味真能使人
孝友之心油然而生也曰所謂生于憂患死于安樂
那二章正是遏人欲而存天理須是恁地看胡泳
聖人之言自是精粗輕重得宜呂伯恭常棣詩章說聖
人之言大小高下皆宜而左右前後不相悖此句說

得極好

鉢

伐木

問伐木大意皆自言待朋友不可不加厚之意所以感發之也曰然又問醜酒云縮酌用茅是此意否恐茅乃以酌曰某亦嘗疑今人用茅縮酒古人芻狗乃酌酒之物則茅之縮酒乃今以酢酒也想古人不肯用絹帛故以茅縮酒也

幹

問神之聽之終和且平曰若能盡其道於朋友雖鬼神

亦必聽之相之而錫之以和平之福素

天保

何福不除義如除戎器之除必大

問如松柏之茂無不爾或承承是繼承相接續之謂如

何曰松柏非是葉不凋但舊葉凋時新葉已生木犀

亦然素

問天保上三章天以福錫人君四章乃言其先君先王亦錫爾以福五章言民亦徧為爾德則福莫大於此

矣故卒章畢言之曰然幹

時舉說第一章至第三章皆人臣頌祝其君之言然辭繁而不殺者以其愛君之心無已也至四章則以祭祀先公為言五章則以徧為爾德為言蓋謂人君之德必上無媿於祖考下無媿於斯民然後福祿愈遠而愈新也故末章終之以無不爾或承先生頷之叔重因云蓼蕭詩云令德壽豈亦是此意蓋人君必有此德而後可以稱是福也曰然時舉

采薇

又說采薇首章略言征夫之出蓋以獫狁不可不征故舍其室家而不遑寧處二章則既出而不能不念其家三章則竭力致死而無還心不復念其家矣四章五章則惟勉於王事而欲成其戰伐之功也卒章則言其事成之後極陳其勞苦憂傷之情而念之也其序恐如此曰雅者正也乃王公大人所作之詩皆有次序而文意不苟極可玩味風則或出於婦人小子

之口故但可觀其大畧耳時舉

出車

問先生詩傳舊取此詩與關雎詩論非天下之至靜不足
足以配天下之至健處今皆削之豈亦以其太精巧耶
曰正為後來者得如此故削去曰關雎詩今引匡衡
說甚好曰呂氏亦引但不如此詳便見古人看文字
亦寬博如此錄

子善問詩畏此簡書簡書有二說一說簡書戒命也隣

國有急則以簡書相戒命一說策命臨遣之詞曰後
說為長當以後說載前前說只據左氏簡書同惡相
恤之謂然此是天子戒命不得謂之隣國也又問胡
不旆旆東萊以為初出軍時旌旗未展為卷而建之
引左氏建而不旆故曰此旗何不旆旆而飛揚乎蓋以命下
之初我方憂心悄悄而僕夫憔悴亦若人意之不舒
也曰此說精巧然胡不旆旆一句語勢似不如此胡
不猶言遐不作人言豈不旆旆乎但我自憂心悄悄

而僕夫又況瘁耳如此却自平正伯恭詩太巧詩正
怕如此者古人意思自寬平何嘗如此纖細拘迫

銖

魚麗

文武以天保以上治內采薇以下治外始於憂勤終於
逸樂這四句儘說得好

道夫

南有嘉魚

子善問南有嘉魚詩中汕汕字曰是以木葉捕魚今所
謂魚花園是也問枸曰是機枸子建陽謂之皆拱子

俗謂之癩漢指頭味甘而解酒毒有人家酒房一柱
是此木而醞酒不成左右前後有此則亦醞酒不成

節

蓼蕭

時舉說蓼蕭湛露二詩曰文義也只如此却更須要諷
詠實見他至誠和樂之意乃好時舉

六月

六月詩既成我服

不失

于三十里

常度

律。方

采芑

時舉說采芑詩曰宣王南征蠻荆想不甚費力不曾大
段戰鬪故只極稱其軍容之盛而已

時舉

車攻

時舉說車攻吉日二詩先生曰好田臘之事古人亦多
刺之然宣王之田乃是因此見得其車馬之盛紀律
之嚴所以為中興之勢者在此其所謂田異乎尋常
之田矣

庭燎

時舉說庭燎有輝曰輝火氣也天欲明而見其烟光相雜此是吳才老之說說此一字極有功也時舉

斯干

楊問橫渠說斯干兄弟宜相好不要相學指何事而言曰不要相學不好處且如兄去友弟弟却不能恭其兄兄豈可學弟之不恭而遂亦不友為兄者但當盡其友可也為弟能恭其兄兄乃不友其弟為弟者豈

可亦學兄之不友而遂忘其恭為弟者但當知其盡
恭而已如寇萊公撻倒用印事王文正公謂他底既
不是則不可學他不是亦是此意然詩之本意猶字

作相圖謀說寓

載弄之瓦瓦紡磚也紡時所用之物舊見人畫列女傳
漆室乃手執一物如今銀子樣意其為紡磚也然未

可必時
舉

節南山

自古小人其初只是它自竊國柄少間又自不奈何引
得別人來一齊不好了如尹氏太師只是它一箇不
好少間到那瑣瑣姻婭處是幾箇人不好了義剛

秉國之均均本當從金所謂如泥之在釣者不知釣是
何物時舉曰恐只是為丸器者所謂車盤是也蓋運
得愈急則其成器愈快恐此即是釣曰秉國之釣只
是此義今集傳訓平者此物亦惟平乃能運也時舉

小弁

問小弁詩古今說者皆以為此詩之意與舜怨慕之意同竊以為只我罪伊何一句與舜於我何哉之意同至後面君子秉心維其忍之與君子不惠不舒究之分明是怨其親却與舜怨慕之意似不同曰作小弁者自是未到得舜地位蓋亦常人之情耳只我罪伊何上面說何辜于天亦一似自以為無罪相似未可與舜同日而語也問莫高匪山莫浚匪泉君子無易由言耳屬于垣集傳作賦體是以上兩句與下兩句

耶曰此只是賦蓋以為莫高如山莫浚如泉而君子亦不可易其言亦恐有人聞之也又曰者小雅雖未畢且併者大雅小雅後數篇大槩相似只消兼者因言詩人所見極大如巧言詩奕奕寢廟君子作之秩秩大猷聖人莫之他人有心予忖度之躍躍僇兔遇犬獲之此一章本意只是惡巧言讒譖之人却以奕奕寢廟與秩秩大猷起興蓋以其大者興其小者便見其所見極大形於言者無非義理之極致也時舉

云此亦是先王之澤未泯理義根於其心故其形於
言者自無非義理先生領之時舉

大東

有餘簋殮有捭棘七詩傳云興也問似此等例却全無
義理曰興有二義有一樣全無義理矣

東有啟明西有長庚庚續也啟明金星長庚水星金在
西故日將出則東見水在日東故日將沒則西見泳

楚茨

楚茨一詩精深宏博如何做得變雅方子

問神保是饗詩傳謂神保是鬼神之嘉號引楚詞語思靈保兮賢姱但詩中既說先祖是皇又說神保是饗似語意重複如何曰近見洪慶善說靈保是巫今詩中不說巫當便是尸却是向來解錯了此兩字文蔚

甫田

子善問甫田詩志大心勞曰小序說志大心勞已是說他不好人若能循序而進求之以道則志不為徒大

心亦何勞之有人之所期固不可不遠大然下手做時也須一步斂一步著實做始得若徒然心務高遠而不下著實之功亦何益哉銖

驕驕張王之意猶曰暢茂桀教耳桀桀與驕驕之義同

今田畝間莠竄硬搶必大

瞻彼洛矣

問瞻彼洛矣洛水或云兩處曰只是這一洛有統言之有說小地名東西京共千里東京六百里西京四百

里賀孫

問韎韐有奭韎韐毛鄭以為祭服王氏以為戎服曰只

是戎服左傳云有韎韐之跗注是也又曰詩多有酬

酢應答之篇瞻彼洛矣臣歸美其君君子指君也當

時朝會於洛水之上而臣祝其君如此裳裳者華又

是君報其臣桑扈鴛鴦皆然賀孫

車牽

問烈女傳引詩辰彼碩女作展彼碩女先生以為然且

云向來煞尋得子方

賓之初筵

或問賓之初筵詩是自作否曰有時亦是因酒之後作此自戒也未可知卓

漸漸之石

周家初興時周原膾膾堇荼如飴苦底物事亦甜及其衰也洋洋墳首三星在蜀人可以食鮮可以飽直恁

地蕭索文蔚

大雅文王

大雅非聖賢不能為其間平易明白正大光明詩

問周受命如何曰命如何受於天只是人與天同然觀
周自后稷以來積仁累義到此時人心奔赴自有不
可已又問太王翦商左氏云太伯不從是以不嗣莫
是此意曰此事難明但太王居於夷狄之邦強大已
久商之政令亦未必行於周大要天下公器所謂有
德者易以興無德者易以亡使紂無道太王取之何

害今必言太王不取則是武王為亂臣賊子若文王之
事則分明是盛德過人處孔子於泰伯亦云至德

可學

文王詩直說出道理

振

帝命文王豈天諄諄然命之耶只文王要德地便是理
合如此便是帝命之也

礪

問先生解文王陟降在帝左右文王既沒精神上與天
合看來聖人稟得清明純粹之氣其生也既有以異

於人則其散也其死與天為一則其聚也其精神上
與天合一陟一降在帝左右此又別是一理與衆人
不同曰理是如此若道真有箇文王上上下下則不
可若道詩人只胡亂恁地說也不可

子蒙

在帝左右察天理而左右也古注亦如此左氏傳天子

所右寡君亦右之所左亦左之之意

人傑

馬節之問無邊爾躬曰無自遏絕於爾躬如家自毀國

自伐

蓋卿

繇

虞芮質厥成文王蹶厥生蹶動也生是興起之意當時
一日之間虞芮質成而來歸者四十餘國其勢張盛
一時見之如忽然跳起又曰麓說時如今人言軍勢

益張義剛

舊嘗見橫渠詩傳中說周至太王辟國已甚大其所據
有之地皆是中國與夷狄夾界所空不耕之地今亦
不復見此書矣意者周之興與元魏相似初自極北

起來漸漸強大到得後來中原無主被他取了廣

棧樸

問棧樸何以見文王之能官人曰小序不可信類如此
此篇與前後數詩同為稱揚之辭作序者為見棧樸
近箇人材底意思故云能官人也行葦序尤可笑第
一章只是起興何與仁及草木以祈黃耇是願頌之
詞如今人舉酒稱壽底言語只見有祈字便說是乞

言帶

棧樸序只下能官人三字便晦了一篇之意楚茨等十
來篇皆是好詩如何見得是傷今思古只被亂在變
雅中便被後人如此想像如東坡說某處猪肉衆客
稱美之意當

倬彼雲漢為章於天周王壽考遐不作人先生以為無
甚義理之興或解云云先生曰解書之法只是不要
添字追琢其章者以金玉其相故也勉勉我王者以
綱紀四方故也瑟彼玉瓚黃流在中豈弟君子福祿

攸降此是比得齊整好者也 璘

詩無許多事大雅精密遐是何字

以彙雅得之

又曰解詩多

是推類得之

方子

遐不作人古注并諸家皆作遠字甚無道理禮記注訓

胡字甚好

人傑。去偽錄注云道隨事着也

皇矣

周人詠文王伐崇伐密事皆以帝謂文王言之若曰此
蓋天意云爾文王既戡黎又伐崇伐密已做得事勢

如此只是尚不肯伐紂故曰至德

必大

時舉說皇矣詩先生謂此詩稱文王德處是從無然畔
援無然歆羨上說起後面却說不識不知順帝之則
見得文王先有這箇工夫此心無一毫之私故見於
伐崇伐密皆是道理合著恁地初非聖人之私怒也
問無然畔援無然歆羨竊恐是說文王生知之資得
於天之所命自然無畔援歆羨之意後面不識不知
順帝之則乃是文王做工夫處曰然時舉

下武

昭茲來許漢碑作昭哉洪氏隸釋茲哉叶韻栢梁臺詩

未句韻亦同

方子

文王有聲

問鎬至豐邑止二十五里武王何故自豐遷鎬曰此只以後來事推之可見秦始皇營朝宮渭南史以為咸陽人多先王之宮庭小故作之想得遷鎬之意亦是如此周得天下諸侯盡來朝覲豐之故宮不足以容

之爾廣

生民

生民詩是叙事詩只得恁地蓋是叙那首尾要盡下武

文王有聲等詩却有反復歌詠底意思義剛

問履帝武敏曰此亦不知其何如但詩中有此語自歐
公不信祥瑞故後人纔見說祥瑞皆闢之若如後世
所謂祥瑞固多偽妄然豈可因後世之偽妄而併真
實者皆以為無乎鳳鳥不至河不出圖孔子之言不

成亦以為非廣

時舉說履帝武敏歆攸介攸止處曰敏字當為絕句蓋作母鄙反叶上韻耳履巨跡之事有此理且如契之生詩中亦云天命玄鳥降而生商蓋以為稷契皆天生之耳非有人道之感非可以常理論也漢高祖之生亦類此此等不可以言盡當意會之可也時舉

既醉

時舉說既醉詩古人祝頌多以壽考及子孫衆多為言

如華封人祝堯願聖人壽願聖人多男子亦此意曰
此兩事孰有大於此者乎曰觀行葦及既醉二詩見
古之人君盡其誠敬於祭祀之時極其恩義於燕飲
之際凡父兄耆老所以祝望之者如此則其獲福也
宜矣此所謂禍福無不自已求之者也先生領之時舉
子善問釐爾女士曰女之有士行者銖曰荆公作向后
冊云唯昔先王釐厥士女士女與女士義自不同蕪
子由曾論及曰恐它只是倒用了一字耳因言荆公

誥詞中唯此冊做得極好後人皆學之不能及銖曰
曾子固作皇太子冊亦放此曰子固誠是學它只是
不及耳子固却是後面幾箇誥詞好國朝之制外而
三公三少內而皇后太子貴妃皆有冊但外自三公
而下內自嬪妃而下皆聽其辭免一辭
即免惟皇后太子

用冊銖

假樂

千祿百福子孫千億是願其子孫之衆多穆穆皇皇宜

君宜王不愆不忘率由舊章是願其子孫之賢道

夫

舜功問不愆不忘率由舊章是勿忘勿助長之意曰不
必如此說不愆是不得過不忘是不得忘能如此則

能率由舊章

可學

此詩末章則承上章之意故上章云四方之綱而下章
即繼之曰之綱之紀蓋張之為綱理之為紀下面百
辟卿士至於庶民皆是賴君以為綱所謂不解於位
者蓋欲綱常張而不弛也

時舉

公劉

問第二章說既庶既繁既順乃宣而第三章方言居邑之成不知未成邑之時何以得民居之繁庶也曰公劉始於草創而人從之者已若是其盛是以居邑由是而成也問第四章君之宗之處曰東萊以為為之立君立宗恐未必是如此只是公劉自為羣臣之君宗耳蓋此章言其一時燕饗恐未說及立宗事也問徹田為糧處先生以為徹通也之說乃是橫渠說然

孟子考之只曰八家皆私百畝同養公田又公羊云
公田不治則非民私田不治則非吏似又與橫渠之
說不同蓋未必是計畝而分也又問此詩與豳七月
詩皆言公劉得民之盛想周家自后稷以來至公劉
始稍盛耳曰自后稷之後至於不窋蓋已失其官守
故云文武不先不窋至於公劉乃始復修其業故周
室由是而興也

時舉

時舉說公劉詩鞞琫容刀注云或曰容刀如言容臭謂

鞞琇之中容此乃也如何謂之容臭曰如今香囊是也時舉

卷阿

時舉說卷阿詩畢以為詩中凡稱頌人君之壽考福祿者必歸於得人之盛故既醉詩云君子萬年介爾景福而必曰朋友攸攝攝以威儀假樂詩言受天之祿與干祿百福而必曰率由羣匹與百辟卿士媚于天子蓋人君所以致福祿者未有不自得人始也先生

頷之時舉

民勞

時舉竊謂每章上四句是刺厲王下六句是戒其同列
曰皆只是戒其同列鋪叙如此便自可見故某以為
古人非是直作一詩以刺其王只陳其政事之失自
可以為戒時舉因謂第二章末謂無棄爾勞以為王
休蓋以為王者之休莫大於得人惟羣臣無弃其功
然後可以為王者之休美至第三章後二句謂敬慎

威儀以近有德蓋以為既能拒絕小人必須自反於已又不可以不親有德之人不然則雖欲絕去小人未必有以服其心也後二章無俾正敗無俾正反尤見詩人憂慮之深蓋正敗則惟敗壞吾之正道而正反則全然反乎正矣其憂慮之意蓋一章切於一章也先生頷之時舉

板

昊天曰明及爾出王昊天曰旦及爾游衍且與明祇一

意這箇豈是人自如此皆有來處纔有些放肆他便

知賀孫錄云這裏若有些
遠理恰似天知得一般

所以曰日監在茲又曰敬

天之怒無敢戲豫敬天之渝無敢馳驅問渝字如何

曰變也如迅雷風烈必變之變但未至怒

道夫。賀
孫錄同

道夫言昨來所論昊天曰明云云至游行此意莫祇是

言人之所以為人者皆天之所為故雖起居動作之
頃而所謂天者未嘗不在也曰公說天體物不遺既
說得是則所謂仁體事而無不在者亦不過如此今

所以理會不透祇是以天與仁為有二也今須將聖賢言仁處就自家身上思量久之自見記曰兩君相見揖讓而入門入門而縣興揖讓而升堂升堂而樂闋下管象武夏籥序興陳其薦俎序其禮樂備其百官如此而後君子知仁焉又曰賓入大門而奏肆夏示易以敬也卒爵而樂闋孔子屢嘆之道夫曰如此則是合正理而不紊其序便是仁曰德地猜終是血脉不貫且反復熟看

道夫

時舉說板詩問天體物而不遺是指理而言仁體事而無不在是指人而言否曰體事而無不在是指心而言也天下一切事皆此心發見爾因言讀書窮理當體之於身凡平日所講貫窮究者不知逐日常見得在吾心目間否不然則隨文逐義趕趁期限不見悅

處恐終無益

時舉○餘見張子書類

蕩

時舉說首章前四句有怨天之辭後四句乃解前四句

謂天之降命本無不善惟人不以善道自終故天命亦不克終如疾威而多邪僻也此章之意既如此故自次章以下托文王言紂之辭而皆就人君身上說使知其非天之過如女興是力爾德不明與天不誨爾以酒匪上帝不時之類皆自發明首章之意先生

頷之時舉

抑

抑非刺厲王只是自警嘗攷衛武公生於厲王末年安

得有刺厲王之詩據國語只是自警詩中辭氣若作
自警甚有理若作刺厲王全然不順伯恭却謂國語
非是浩

抑小序衛武公刺厲王亦以自警不應一詩既刺人又
自警之理且厲王無道一旦被入言提其耳以小子
呼之必不索休且厲王監謗暴虐無所不至此詩無
限大過都不問著却只點檢威儀之末此決不然以
史記考之武公即位厲王死之後宣王之時說者

謂是追刺尤不是伯恭主張小序又云史記不可信
恐是武公必曾事厲王若以為武公自警之詩則其
意味甚長國語云武公九十餘歲作此詩其間匪我
言耄可以為據又如謹而侯度注家云所以制侯國
之度只是侯國之度耳曰喪厥國則是諸侯自謂無
疑蓋武公作此詩使人日夕諷誦以警已耳所以有
小子告爾之類皆是箴戒作文之體自指耳

後漢侯
芭亦有

○此說
帶

先生說抑詩煞好鄭謂東萊硬要做刺厲王緣以爾汝字礙曰如幕中之辨人反以汝為叛臺中之評人反以汝為傾等類亦是自謂古人此樣多大抵他說詩其原生於不敢異先儒將詩去就那序被這些子礙便轉來穿鑿胡說更不向前來廣大處去或有兩三說則俱要存之如一句或為興或為比或為賦則曰詩兼備此體某謂既取興體則更不應又取比體既取比體則更不應又取賦體說狡童便引石虎事證

且要有字不曳白南軒不解詩道詩不用解諸先生
說好了南軒却易晚說與他便轉淳

衛武公抑詩自作懿戒也中間有嗚呼小子等語自呼
而告之也其警戒持循如是所以詩人美其如切如
磋方

雲漢

問雲漢詩乃他人述宣王之意然責已處太少曰然可學

崧高

問崧高丞民二詩是皆遣大臣出為諸侯築城曰此也
曉不得封諸侯固是大事看黍苗詩當初召伯帶領
許多車從人馬去也自勞攘古人做事有不可曉者
如漢築長安城都是去別處調發人來又只是數日
便休詩云溥彼韓城燕師所完注家多說是燕安之
衆某說即召公所封燕國之師不知當初何故不只
教本土人築又須去別處發人來豈不大勞攘古人
重勞民如此等事又却不然更不可曉強說便成穿

鑿又曰者烝民詩及左傳國語周人說底話多有好處也是文武周公立學校教養得許多人所以傳得這些言語如烝民詩大故細膩劉子曰人受天地之中以生皆說得好

變孫○義
剛錄小異

烝民

問烝民詩解云仲山甫蓋以冢宰兼太保何以知之曰其言式是百辟則是為宰相可知其曰保茲天子王躬是保則是為太保可知此正召康公之舊職

廣

仲山甫之德柔嘉維則詩傳中用東萊呂氏說先生曰
記得他甚主張那柔字文蔚曰他後一章云柔亦不
茹剛亦不吐此言仲山甫之德剛柔不偏也而二章
首舉仲山甫之德獨以柔嘉維則蔽之崧高稱申伯
番番終論其德亦曰柔惠且直然則入德之方其可
知矣曰如此則乾卦不用得了人之資稟自有柔德
勝者自有剛德勝者如本朝范文正公富鄭公輩是
以剛德勝如范忠宣范淳夫趙清獻蘓子容輩是以柔

德勝只是他柔却柔得好今仲山甫令儀令色小心翼翼却是柔但其中自有骨子不是一向如此柔去便是人看文字要得言外之意若以仲山甫柔嘉維則必要以此為入德之方則不可人之進德須用剛

健不息

文蔚

既明且哲以保其身曰只是上文肅肅王命仲山甫將之邦國若否仲山甫明之便是明哲所謂明哲者只是曉天下事理順理而行自然災害不及其身可以

保其祿位今人以邪心讀詩謂明哲是見幾知微先去占取便宜如揚子雲說明哲煌煌旁燭無疆遂於不虞以保天命便是占便宜底說話所以它一生被這幾句誤然明哲保身亦只是常法若到那舍生取義處又不如此論文蔚

問既明且哲以保其身有些小委曲不正處否曰安得此只是見得道理分明事事處之得其理有可全之道便有委曲處亦是道理可以如此元不失正特不

直犯之耳若到殺身成仁處亦只得死古人只是平
說中庸無一理不明即是明哲若只見得一偏便有
蔽便不能見得理盡便不可謂之明哲學至明哲只
是依本分行去無一事不當理即是保身之道今人
皆將私看了必至於孔光之徒而後已

周頌清廟

假以溢我當從左氏作何以恤我何遐通轉而為假也

方子

昊天有成命

昊天有成命詩成王不敢康詩傳皆斷以為成王誦某
問下武言成王之孚如何曰這箇且只得做武王說
矣

我將

問我將乃祀文王於明堂之樂章詩傳以謂物成形於
帝人成形於父故季秋祀帝於明堂而以父配之取
其成物之時也此乃周公以義起之非古禮也不知

周公以後將以文王配耶以時王之父配耶曰諸儒
正持此二議至今不決看來只得以文王配且周公
所制之禮不知在武王之時在成王之時若在成王
則文王乃其祖也亦自可見又問繼周者如何曰只
得以有功德之祖配之個

敬之

日就月將是日成月長就成也將大也節

絲衣

繹祭之明日也賓尸以賓客之禮燕為尸者敬仲

魯頌泮水

泮宮小序詩傳不取或言詩中既作泮宮則未必非修也直卿云此落成之詩佐

閔宮

太王翦商武王所言中庸言武王纘太王王季文王之緒是其事素定矣橫渠亦言周之於商有不純臣之義蓋自其祖宗遷幽遷岐皆其僻遠自居非商之所

封土也揚

商頌

商頌簡奧

方子

伯豐問商頌恐是宋作曰宋襄一伐楚而已其事可攷
安有莫敢不來王等事又問恐是宋人作之追述往
事以祀其先代若是商時所作商尚質不應商頌反
多於周頌曰商頌雖多如周頌覺得文勢自別周頌
雖簡文自平易商頌之辭自是奧古非宋襄可作又

問頌是告于神明却魯頌中多是頌當時之君如戎狄是鷹荆舒是懲僖公豈有此事曰是頌願之辭又問戎狄是鷹荆舒是懲孟子引以為周公如何曰孟子引經自是不仔細又問或謂魯頌非三百篇之類夫子姑附於此耳曰思無邪一句正出魯頌帶

玄鳥


問玄鳥詩吞卵事亦有此否曰當時恁地說必是有此今不可以聞見不及定其為必無淳

長發

湯降不遲聖敬日躋天之生湯恰好到合生時節湯之

修德又無一日間斷

啓



朱子語類卷八十一

欽定四庫全書

子部

朱子語類卷八十二

詳校官中書臣程炎

刑部郎中臣許兆椿覆勘

總校官中書臣朱鈇

校對官學正臣李巖

謄錄舉人臣黃嵩齡

欽定四庫全書

朱子語類卷八十二

孝經

因說孝經是後人綴緝問此與尚書同出孔壁曰自古如此說且要理會道理是與不是適有問重卦并彖象者某答以且理會重卦之理不必問此是誰作彼

是誰作

因言學者却好聚語孟禮書言孝處附之於後○士毅

問孝經一書文字不多先生何故不為理會過曰此亦

難說據此書只是前面一段是當時曾子聞於孔子者後面皆是後人綴緝而成問如天地之性人為貴人之行莫大於孝恐非聖人不能言此曰此兩句固好如下面說孝莫大於嚴父嚴父莫大於配天則豈不害理儻如此則須是如武王周公方能盡孝道尋常人都無分盡孝道也豈不啓人僭亂之心其中煞有左傳及國語中言語或問莫是左氏引孝經中言語否曰不然其言在左氏傳國語中即上下句文理

相接在孝經中却不成文理見程沙隨說向時注端
明亦嘗疑此書是後人偽為者廣

古文孝經亦有可疑處自天子章到孝無終始而忠不
及者未之有也便是合下與曾子說底通為一段只
逐章除了後人所添前面子曰及後面引詩便有首
尾一段文義都活自此後却似不曉事人寫出來多
是左傳中語如以順則逆民無則焉不在於善而皆
在於凶德是季文子之辭却云雖得之君子所不貴

不知論孝却得箇甚底全無交涉如言斯可道行斯可樂一段是北宮文子論令尹之威儀在左傳中自有首尾載入孝經都不接續全無意思只是雜史傳中胡亂寫出來全無義理疑是戰國時人闖湊出者又曰胡氏疑是樂正子春所作樂正子春自細膩却不如如此說

留

古文孝經却有不似今文順者如父母生之續莫大焉又著一箇子曰字方說不愛其親而愛他人者謂之

悖德兼上更有箇子曰亦覺無意思此本是一段以
子曰分為三恐不是溫公家範以父子兄弟夫婦等
分門却成一箇文字但其間有欠商量未通行者耳
本作一段聯寫去今印者分作小段無意思伯恭聞
範無倫序其所編書多是如此

賀孫

孝經疑非聖人之言且如先王有至德要道此是說得
好處然下面都不曾說得切要處著但說得孝之效
如此如論語中說孝皆親切有味都不如此士庶人

章說得更好只是下面都不親切賜

問向見先生說孝莫大於嚴父嚴父莫大於配天非聖人之言必若此而後可以為孝豈不啓人僭亂之心而中庸說舜武王之孝亦以尊為天子富有四海之內言之如何曰中庸是著舜武王言之何害若汎言人之孝而以此為說則不可廣

器之問嚴父配天曰嚴父只是周公於文王如此稱纔是成王便是祖此等處儘有理會不得處大約必是

郊時是后稷配天明堂則以文王配帝孝經亦是湊
合之書不可盡信但以義起亦是如此因說孝經只
有前一段後皆云廣至德廣要道都是湊合來演說
前意但其文多不全只是諫諍五刑喪親三篇稍是
全文如配天等說亦不是聖人說孝來歷豈有人人
皆可以配天豈有必配天斯可以為孝如禮記煞有
好處可附於孝經賀孫問恐後人湊合成孝經時亦
未必見禮記如曲禮少儀之類猶是說禮節若祭義

後面許多說孝處說得極好豈不可為孝經曰然今

看孝經中有得一段似這箇否

賀孫

問郊祀后稷以配天宗祀文王於明堂以配上帝此說如何曰此自是周公創立一箇法如此將文王配明堂永為定例以后稷郊推之自可見後來妄將嚴父之說亂了賜

問配天配上帝帝只是天天只是帝却分祭何也曰為壇而祭故謂之天祭於屋下而以神祇祭之故謂之

帝寓

明察是彰著之義能事父孝則事天之理自然明能事

母孝則事地之理自然察

道夫

朱子語類卷八十二